



KOMISIJA ZA PRIPREMANJE PRIJEDLOGA ZA IZBOR NASTAVNIKA/CE U ZVANJE REDOVNOG PROFESORA/ICE ZA OBLAST RIMSKO PRAVO

Dr. sc. Enes Durmišević, redovni profesor Pravnog fakulteta Univerziteta u Sarajevu, za oblast Pravna historija, predsjednik

Dr. sc. Mirela Šarac, redovna profesorica u trajnom zvanju na Pravnom fakultetu Sveučilišta u Splitu za oblast Rimsko pravo, članica

Dr. sc. Marija Ignjatović, redovna profesorica na Pravnom fakultetu Univerziteta u Nišu za oblast Rimsko pravo, članica

**UNIVERZITET U SARAJEVU
PRAVNI FAKULTET**

**UNIVERZITET U SARAJEVU – PRAVNI FAKULTET
VIJEĆU PRAVNOG FAKULTETA**

- ovdje

Broj: 01-M72/22

Datum; 16. 06. 2022 god.

Sarajevo, 15. 6. 2022. godine

PREDMET: *Izvještaj Komisije za pripremanje prijedloga za izbor u akademsko zvanje redovni/a profesor/ica za oblast Rimsko pravo, dostavlja se –*

(I) Podaci o objavljenom konkursu i formiranju Komisije

Pravni fakultet Univerziteta u Sarajevu, na osnovu usvojenog dinamičkog plana potreba za raspisivanje konkursa za izbor u zvanje u akademskoj 2021/22. godini (redni broj 6. Dinamičkog plana potreba za raspisivanje konkursa za izbor u studijskoj 2021/22. godini koji je usvojen Odlukom br. 01-1471/21 od 22. 09. 2021. godine), nakon saglasnosti Univerziteta u Sarajevu, broj 01-6-67/22 od 27. 4. 2022. godine, a u skladu sa članom 103. Zakona o visokom obrazovanju („Službene novine Kantona Sarajevo“ broj 33/17, 35/20 i 40/20) i člana 201. i 202. Statuta Univerziteta u Sarajevu broj: 01-1093-3-1/18 od 28. 11. 2018. godine raspisao je konkurs za izbor u akademsko zvanje na naučnu oblast: Rimsko pravo – jednog (1) nastavnika u zvanju redovnog profesora, puno radno vrijeme.

Univerzitet u Sarajevu – Pravni fakultet – Obala Kulina bana 7, 71000 Sarajevo - Bosna i Hercegovina
Telefon: +387 (0)33 206-350 (centrala); +387 (0)33 206-355 (fax)
www.pfsa.unsa.ba



Konkurs je objavljen u dnevnom listu „Oslobođenje“ broj 26.996 od 20. 5. 2022. godine, službenim internet adresama Pravnog fakulteta Univerziteta u Sarajevu (<https://www.pfsa.unsa.ba/pf/category/konkursi-i-oglas/>) i Univerziteta u Sarajevu (<https://www.unsa.ba/konkursi>).

Na osnovu člana 106, stav (2) ZVO i čl. 205, st. (1) Statuta, Vijeće Pravnog fakulteta je na sjednici održanoj 8. 6. 2022. godine donijelo Odluku o imenovanju Komisije za pripremanje prijedloga za izbor jednog nastavnika u zvanju redovnog profesora na predmetima naučne oblasti Rimsko pravo u sastavu:

1. **Dr. sc. Enes Durmišević**, redovni profesor Pravnog fakulteta Univerziteta u Sarajevu, za oblast Pravna historija, predsjednik
2. **Dr. sc. Mirela Šarac**, redovna profesorica u trajnom zvanju na Pravnom fakultetu Sveučilišta u Splitu, za oblast Rimsko pravo, članica
3. **Dr. sc. Marija Ignjatović**, redovna profesorica na Pravnom fakultetu Univerziteta u Nišu, za oblast Rimsko pravo, članica

Na osnovu Odluke o imenovanju Komisije za pripremanje prijedloga za izbor broj br. 01-1112-1/22) od 8. 6. 2022. godine zadatak Komisije je da podnese pisani Izvještaj sa prijedlogom Vijeću Pravnog fakulteta u Sarajevu, a u skladu sa tekstom raspisanog konkursa u roku od 45 dana od isteka roka za podnošenje prijave na konkurs.

Komisije je primila jednu prijavu za izbor u akademsko zvanje redovni profesor na oblasti Rimsko pravo. U skladu s člana 107, stav (1) ZVO i člana 204. Statuta, Stručna služba je u pisanoj formi potvrdila (Potvrda br. 01-1151/22 od 13. 6. 2022. godine) kako je prijava kandidata dr. sc. Zdravka Lučića blagovremena i uredna u skladu s uslovima konkursa.



Kandidat je uz prijavu dostavio dokumente kako slijedi:

1. Biografiju i bibliografiju;
2. Rodni list izdat od strane Općine Centar Sarajevo;
3. Uvjerenje o državljanstvu izdato od strane Općine Centar Sarajevo;
4. Ovjerene fotokopije diploma o stjecanju zvanja diplomirani pravnik 1979. godine; magistra pravnih nauka 1988. godine i doktora pravnih nauka 1999. godine.
5. Potvrdu br. 01-886/22 od 28. 4. 2022. godine kojom potvrđuje proveden izborni period u zvanju vanrednog profesora;
6. Potvrdu br. 01-1024-1/22 od 23. 5. 2022. godine kojom potvrđuje uspješno mentorstvo kandidata na drugom ciklusu studija;
7. Odluku o izmjeni i dopuni Komisije za ocjenu i odbranu projekta, radne verzije i doktorske disertacije br. 01-6-125/22 od 27. 4. 2022. godine imenovan je i za jednog od mentora kandidatu Mirzi Hebibu, mag. iur. u okviru doktorske disertacije „Plodouživanje (*ususfructus*): primjena rimskog koncepta u dubrovačkom pravu“;
8. Dvije (2) knjige objavljene u razdoblju 2021. i 2022. godine u izdanju Pravnog fakulteta UNSA;
9. Trinaest (13) radova objavljenih ili upućenih u proces objave u razdoblju od 2018. do 2022. godine.
10. Potvrdu br. 17/22 od 27. 4. 2022. godine kojom se potvrđuje sudjelovanje na naučno-stručnom projektu „Počitelj – sjaj koji blijedi“ udruženja Trezvenost i brošuru publiciranu u okviru projekta;
11. Potvrdu o participiranju u osnivanju međunarodnog udruženja za rimsko pravo i rimsku pravnu tradiciju *Societas pro iure Romano* u Sofiji i aktivnostima udruženja.



Komisija je nakon razmatranja dostavljene dokumentacije a u skladu sa članovima 106-108. Zakona o visokom obrazovanju i člana 205. Statuta Univerziteta u Sarajevu, podnosi sljedeći

I Z V J E Š T A J

1. Uvjeti za izbor nastavnika u zvanje redovnog profesora

Uvjeti utvrđeni članom 96, stav (1), tačke f) Zakona o visokom obrazovanju i člana 194, stav (1), tačke f) Statuta Univerziteta u Sarajevu za izbor nastavnika u zvanje redovnog profesora su:

- a) proveden najmanje jedan izborni period u zvanju vanrednog profesora;
- b) najmanje osam naučnih radova objavljenih u priznatim publikacijama koje se nalaze u relevantnim naučnim bazama podataka;
- c) najmanje dvije objavljene knjige;
- d) originalni stručni uspjeh kao što je projekt, patent ili originalni metod;
- e) uspješno mentorstvo najmanje po jednog kandidata za stepen drugog, odnosno integriranog ciklusa studija i trećeg ciklusa studija.

U skladu sa članom 102, stav (2) Zakona o visokom obrazovanju objavljeni radovi, knjige i rezultati vlastitih istraživanja u primjeni, projekti i mentorstva se vrednuju samo ukoliko su nastali u vremenu od posljednjeg izbora u zvanje tj. u konkretnom slučaju od izbora u zvanje vanrednog profesora. Također, Komisija konstatira kako je član 115, stav (2) ostavio mogućnost da pri izboru u akademsko zvanje kandidata, koji iz objektivnih razloga nije ispunio uslov mentorstva za treći ciklus, uvodi mogućnost supstituiranja mentorstva s tri dodanta naučna rada objavljena u citatnim bazama podataka, a u odnosu na minimalne uslove utvrđene zakonom.



2. Osnovni biografski podaci kandidata

Kandidat dr. sc. Zdravko Lučić rođen je 14. 2. 1957. godine u Živinicama. Osnovnu školu i gimnaziju završio je u Živinicama. Na Pravnom fakultetu Univerziteta u Sarajevu diplomirao je 1979. godine. Zvanje magistra pravnih nauka stekao je na Pravnom fakultetu Univerziteta u Beogradu 1988. godine, odbranivši magistarski rad pod naslovom *Plinijeva Pisma kao izvor za istoriju rimskog prava*. Zvanje doktora pravnih nauka stekao je na Pravnom fakultetu Univerziteta u Sarajevu 1999. godine, odbranivši doktorsku disertaciju pod naslovom *Ius naturalae u djelu Marka Tulija Cicerona*.

Po završetku fakulteta godinu dana radio je u pravnoj službi Tvornice „Žica“ u Sarajevu. Od 1980. godine zaposlen je na Pravnom fakultetu u Sarajevu, u zvanjima asistenta (1980.), višeg asistenta (1997.); docenta (2000.); vanrednog profesora (2007.); vanrednog profesora (2018.). Od 2000. do 2010. godine predavao je i na Pravnom fakultetu Univerziteta „Džemal Bijedić“ u Mostaru.

Uža oblast naučnog interesa u akademskoj karijeri kandidata je kritička historija nepravničkih izvora i opća recepcija rimskog prava. Član je romanističke udruge SIHDA (*Société Internationale Fernand de Visscher pour l'Histoire des Droits de l'Antiquité*) sa sjedištem u Parizu, te jedan od osnivača i član udruženja za rimsko pravo i rimsku pravnu tradiciju SIR (*Societas pro iure Romano*) sa sjedištem u Sofiji. Tokom akademske karijere realizirao je dva studijska boravka u svrhu naučnog i stručnog usavršavanja, u Njemačkoj, na *Universität Mannheim* u ak. 1987/88. godini i u Austriji, na *Universität Graz* 2001. godine. Sudjelovao je u velikom broju naučnih konferencija u Bosni i Hercegovini i inozemstvu, među ostalim Hrvatskoj, Srbiji, Italiji, Brazilu, Ujedinjenom Kraljevstvu, Švicarskoj, Španjolskoj, Turskoj, Njemačkoj i Austriji. Kandidat je autor šest knjiga, od čega su posljednje dvije objavljene od posljednjeg izbora u zvanje vanrednog profesora te će biti predmetom posebne analize Komisije u nastavku Izvještaja. Do posljednjeg izbora u zvanje vanrednog profesora objavio je:



- (1) *Rimsko privatno pravo*, Pravni fakultet u Sarajevu/Naklada Bošković, Sarajevo/Split, 2006./2011., str. 319 (univerzitetski udžbenik, koautorstvo s Šarac, M.);
- (2) *Ciceron i prirodno pravo*, Pravni fakultet u Sarajevu, Sarajevo, 2006., str. 272 (monografija, naučna);
- (3) *Imperium und Provinzen (Zentrale und Regionen)*, Pravni fakultet u Sarajevu, Sarajevo, 2006., str. 232 (zbornik radova, naučni, urednik i priređivač sa Thuerom Gerhardom);
- (4) *Osnove evropskog privatnog prava*, Pravni fakultet u Sarajevu, Sarajevo, 2016., str. 200 (univerzitetski udžbenik).

Do posljednjeg izbora u zvanje vanrednog profesora (2018. godine) objavio je preko 40 naučnih i drugih stručnih priloga u časopisima u Bosni i Hercegovini i inozemstvu. Recenzent je u nekoliko naučnih časopisa, među ostalim *Godišnjaka Pravnog fakulteta u Sarajevu*, te časopisima *Pregled*, *Pravna misao* i *Dijalozi*. U dva navrata (2003. i 2007. godine) je recenzirao publikacije za ugledni *Zeitschrift der Savigny-Stiftung für Rechtsgeschichte*.

Tokom dugogodišnje karijere, obnašao je dužnosti člana Ustavne komisije Doma naroda Federacije Bosne i Hercegovine, zamjenika predsjednika Upravnog odbora Centra Skenderija, predsjednika Upravnog odbora Investicijske banke Federacije Bosne i Hercegovine, zamjenika predsjednika Upravnog odbora Centra za edukaciju sudija i tužitelja Federacije Bosne i Hercegovine, člana Državne komisije za saradnju Bosne i Hercegovine sa UNESCO-m, prodekana za finansije na Pravnom fakultetu u Sarajevu, rukovodioca Odjeljenja Pravnog fakulteta Sarajevo u Tuzli, predsjednika Komisije za izdavačku djelatnost Pravnog fakulteta, člana Komisije za prijem studenata na doktorski studij, člana Odbora za osiguranje kvaliteta. Od 2019. godine je šef Katedre za pravnu historiju i komparativno pravo i član Kolegija Pravnog fakulteta Univerziteta u Sarajevu.

Kandidat je u biografiji naznačio kako je po nacionalnosti Hrvat, kako je oženjen i otac jednog djeteta.



3. Naučno-istraživački rad, stručni i profesionalni rad kandidata

Na osnovu člana 102, stav (2) Zakona o visokom obrazovanju, Komisija dostavlja kratki prikaz i ocjenu knjiga i radova kandidata koji su objavljeni nakon posljednjeg izbora u zvanje vanrednog profesora (2018.) godine.

3.1. Knjige

3.1.1. Klasični pravni tekstovi – Priručnik, Pravni fakultet UNSA, Sarajevo, 2021, str. 168. Riječ je o univerzitetskom praktikumu koji po koncepciji, obimu i jeziku spada u dodatnu udžbeničku literaturu za pripremanje ispita iz rimskog prava na prvom, drugom i trećem ciklusu studija. Knjiga se sastoji od predgovora, uvoda i analize rimskih pravnih izvora. U okviru predgovora je naznačen značaj i potreba ovakvog djela kao dodatnog materijala u procesu obrazovanja pravnika. Naglašeno je kako knjiga treba omogućiti studentima spoznaju romanističkih fundamenata evropskog privatnog prava. Kroz didaktičke metode studentima se pokušavaju prezentirati elementarna saznanja i pravnički ugao gledanja na osnovne institute tretiranih područja pravnog reguliranja. Kratkim analizama izvornog materijala studentima se približava svestranost i genijalnost rimske kazuistike sa svim njenim osobenostima sekulariziranog racionaliteta. U uvodu je objašnjeno kako se rimski pravni tekstovi odlikuju sposobnošću da sa što manje riječi iskažu maksimum pravnog sadržaja, i kao takvi su kako kulturno-historijski tako i pravnički ostali interesantni sve do danas. Klasični pravni tekstovi su remek-djela pravničkog rezoniranja. Time su jasno naglašene romanističke tendencije u valorizaciji civilizacijskih dosega rimskog prava. Nit dugotrajnog i danas aktuelnog procesa recepcije rimskog prava autor prezentira na primjerima najvažnijih pravnih instituta koji su svoje mjesto pronašli u modernim građanskim kodifikacijama. Primjera radi, autor osobito ističe proces recepcije rimskog principa *bonae fides*.



U trećem dijelu sistematizirani su različiti izvori, prvenstveno rimskog stvarnog i obligacionog prava (pravo i pravednost, posjed i vlasništvo, kupoprodaja, *locatio conductio*, mandat, izigravanje povjerioca, posloводство bez naloga, neosnovano bogaćenje, krađa i prevara), a koji potvrđuju kako su nadživjeli mjesto i vrijeme njihova nastanka. Praktikum su recenzirale prof. dr. sc. Mirela Šarac s Pravnog fakulteta u Splitu i prof. dr. sc. Emilija Stanković s Pravnog fakulteta u Kragujevcu.

- 3.1.2. *Plinijeva pisma - doprinos poznavanju rimskog prava***, Pravni fakultet UNSA, 2022, str. 182. Riječ je o naučnoj monografiji koja po prvi puta na našim prostorima uvodi koncept nepravničkih izvora u obzore interesa istraživača u polju rimskog prava. Knjiga se sastoji od Predgovora koji je sačinio ugledni romanist prof. dr. sc. Samir Aličić; Uvoda; dva poglavlja: Javno pravo u pismima Plinija Mlađeg i Privatno pravo u pismima Plinija Mlađeg; Zaključnih napomena i Bibliografije. Problematika kojom se autor bavi u knjizi spada u kategoriju literarnih antičkih djela koja nisu dovoljno obrađena s aspekta njihova valoriziranja kao izuzetno važan pravni izvor. Autor je kroz svoja višegodišnja naučna istraživanja uspješno markirao, analizirao, tumačio i čitateljima predstavio složenu problematiku na vrlo jednostavan i pristupačan način. U knjizi je zahvaćena cjelina sadržaja rimskog prava, kako u segmentu privatnog, tako i u segmentu javnog prava. Naročito veliki doprinos daje analizom javno-pravnih instituta cijeneći da se u romanistici na našim područjima ovome gotovo nikako nije posvećivala pažnja. Djelo je pisano vrlo razumljivim stilom i jezikom, a pitanja koja je autor odabrao su izrazito interesantna. S tim u vezi, mišljenja smo kako djelo može biti interesantno široj pravničkoj javnosti, koja može spoznati vrijednost rimskog prava i njegovu, gotovo svakodnevnu, primjenjivost. U ovoj knjizi autor je spojio najbolje od dva svijeta. S jedne strane, tu je virtuoznost u lingvističkoj i pravnoj metodi prilikom obrade izvora i literature, te savršenstvo metoda i stila koji krase zapadnoevropske naučnike. S druge strane, prisutna je svijest o značaju društvenih prilika za razvoj prava i, posljedično, potrebi za posjedovanjem široke naučne erudicije koja prelazi granice pravne i filološke nauke, što je jedna od najljepših karakteristika



romanistike južnoslavenskih prostora. Riječ je o djelu koje po kvalitetu nimalo ne zaostaje za djelima vrhunskih savremenih romanista, a u isto vrijeme se ne odriče najboljih tradicija naše romanističke škole, i nosi snažno i originalno “naše” obilježje.

Monografiju su recenzirale prof. dr. sc. Mirela Šarac s Pravnog fakulteta u Splitu i prof. dr. sc. Emilija Stanković s Pravnog fakulteta u Kragujevcu.

3.2. Radovi u relevantnim publikacijama

Kandidat je od posljednjeg izbora objavio tri (3) članka u Godišnjaku Pravnog fakulteta u Sarajevu. Časopis je indeksiran u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost). Radovi pod 3.2.2. i 3.2.3. su prošli recenzentski postupak i prihvaćeni su od Redakcije časopisa za objavu, a što je vidljivo i iz potvrda priloženih uz iste.

3.2.1. *Metode rada rimske klasične pravne nauke*, Godišnjak Pravnog fakulteta u Sarajevu, br. LXIII, 2020, str. 415-430 (pregledni naučni rad). U radu se ukazuje na rimski pravnički genij i pokušava predstaviti osnovne karakteristike metodološkog instrumentarija koji su koristili rimski klasični pravnici. Polazi se od objašnjenja termina *agere*, *cavere* i *respondere*, koji su označavali stvaralački djelokrug antičkih rimskih pravnika. Daju se objašnjenja fenomena klasične rimske jurisprudencije kao osobenog civilizacijskog dometa. U kontekstu procesa recepcije rimskog prava naglašava se značaj i aktualnost rimskih pravnih regula. *Ratio legis* se tretira kao polazišno ishodište rimske pravničke originalnosti. Pravna terminologija i tehnike jurističkog načina razmišljanja su osnovni postulati angažmana rimskih *iuris prudentes* ili poznavatelja pravničke umjetnosti. Vještina umjetničkog oblikovanja prava ilustrativno se predstavlja na primjerima rimskih pravnih pojmova *aequitas* i *bona fides*, uz primjenu *rationes decidendi* i *ratio distinguendi*.



U konačnici, autor pledira za primjenu metoda rimske klasične jurisprudencije kao bazičnoj osnovi vođenja savremenog edukativnog procesa modernih evropskih pravnika.

3.2.2. *Rimsko pravo – legitimacijski faktor evropskog identiteta*, Jubilarni Godišnjak Pravnog fakulteta u Sarajevu povodom 75 godina rada Pravnog fakulteta u Sarajevu, br. LXV, Sarajevo, 2022. (izvorni naučni rad, koautorstvo sa Mirzom Hebibom). Riječ je o vrlo obimnom radu nastalom kroz dugo istraživanje koje uključuje i obradu arhivske građe. Autori objašnjavaju kako rimsko pravo predstavlja jedno od temeljnih civilizacijskih dostignuća i posebnosti evropskog kontinenta, naglašavajući kako je rimsko pravo savremenom evropskom pravu podarilo temeljne vrijednosti, pojmove i institute, te bez njegova proučavanja i poučavanja ne postoji mogućnost razumijevanja evropske pravne kulture i privatnopravne teorije. Zbog posebne uloge u razvoju prava, katkad se *romanitas* nekog područja ističe kao jedno od mjerila evropskog identiteta. U radu se analiziraju položaj rimskog prava u okviru univerzitetskog pravničkog obrazovanja na Višoj islamskoj šerijatsko-teološkoj školi (1937–1945) i Pravnom fakultetu u Sarajevu (od 1946). Ukazuju na tradiciju združenosti *mos italicus* i *mos gallicus* u proučavanju i podučavanju rimskog prava, te izazove i perspektive s kojima se rimsko pravo kao nastavni predmet i naučna disciplina suočavalo imajući u vidu širi historijski kontekst. Komisija osobito prepoznaje značaj analize programa rimskog prava u okviru VIŠT-a, koje ima veliki značaj za razumijevanje procesa razvoja pravne misli u Bosni i Hercegovini. Zaključci do kojih su autori došli predstavljaju značajan *novum* i direktno se reflektiraju na razumijevanje historije Univerziteta u Sarajevu, koji je nedvojebno stariji od godina koje se uzimaju u službenim dokumentima.

3.2.3. *Pravni osnovi antičkih rimskih progona kršćana*, Godišnjak Pravnog fakulteta u Sarajevu, Sarajevo, god. LXVI, 2022. (izvorni naučni rad). U radu se analiziraju društvene okolnosti nastanka kršćanstva i odnos ovog religijskog pokreta prema tradicijskoj rimskoj vjerskoj politici politeizma. Posebno se naglašava problematika potrebe različitog



vrednovanja kršćanskih i svjetovnih izvora u prosudbi fenomena progona kršćana. Daje se osvrt na odnose kršćanske i jevrejske religijske zajednice. Hronološki se predstavljaju postupci pojedinih careva sa naglaskom na vladavinu Dioklecijana i njegove edikte o progonima kršćana. Centralni dio rada je posvećen analizi pravnih osnova za kršćanske progone, sa posebnim osvrtima na carske reskripte, edikte, *crimen maiestatis*, *coercitio*. Ukazuje se na poseban status kršćanskih općina. Autor zaključuje kako je osnovni razlog proganjanja kršćana je njihovo odbijanje priznavanja rimskog vladara – cara za Boga. Pagani su kršćane proglašavali za bezbožnike. Takvo ponašanje kršćanskih pristalica je od strane rimskih vlasti tretirano kao posebni oblik *crimen laese maiestatis*, označavan terminom *lesae divinitatum*. Iako u historijskom toku aktivnosti progona kršćana susrećemo različite modalitete postupanja pojedinih careva u osnovi se oni mogu tretirati kao biće ovog specifičnog kažnjivog djela koji svoju osebnost različitosti sadržaja i aktuelnost nije izgubio niti u moderno doba. Odnos države i religije, od antike do danas, pripada sferi pravno-političkih pitanja, čime se ova tema aktuelizira u savremenom kontekstu. Osobit značaj predmetne studije jeste činjenica da o ovim pitanjima u našoj romanistici do sada nije bilo značajnijih radova.

Kandidat je objavio je tri (3) članka u časopisu *Bosna Franciscana*. Časopis je indeksiran u međunarodnoj referentnoj bazi Central and Eastern European Online Library (CEEOL). Riječ je o časopisu Franjevačke teologije u Sarajevu, koji izlazi duže sedamdeset godina i kao takav predstavlja časopis od nacionalnog značaja. Rad pod 3.2.6. je prošao recenzentski postupak i prihvaćen je od Redakcije časopisa za objavu, a što je vidljivo i iz potvrde priložene uz isti.

3.2.4. Počitelj kao poveznica antike, sadašnjosti i budućnosti, *Bosna Franciscana*, br. 55, 2021, str. 41-53. Rad nije kategoriziran. Komisija ga kategorizira kao pregledni naučni rad. Riječ je o naučnom radu proizašlom iz projekta „Počitelj – sjaj koji blijedi“. U okviru rada autor objašnjava značaj interdisciplinarnog pristupa u procesu stvaranja jasne slike za razumijevanje prošlosti, sadašnjosti i budućnosti Počitelja. Historijski slijed se prati od



antičkih vremena, srednjovjekovlja i današnjice. Analiziraju se radovi pionira bosanskohercegovačke arheologije – dr. sc. Ćire Truhelke, Vaclava Radimskog, Karla Pača, dr. sc. Esada Pašalića, Veljka Paškvalina i drugih. Ukazuje se na značaj otkrića 150 metara kvadratnih rimskih mozaika u Skelanima od strane arheologa mr. sc. Mirka Babića. Autor pojašnjava važnost neophodnosti osiguranja kontinuiteta naučnih istraživanja na polju arheološko-historijskih nauka. Ukazuje kako bez čvrstih povezivanja naučnih dostignuća sa nosiocima turističkih djelatnosti nema uspješne valorizacije i upotrebljive privredne prezentacije tih istraživanja. Eventualne različitosti u postignutim rezultatima istraživanja ne treba da prati naučna isključivost već tolerancija i stalna otvorenost puteva ka novim saznanjima. Na kraju se ukazuje kako Počitelju treba pristupiti smišljenom akcijom, osiguravajući organizacijskog titulara koji će ga povezivanjem i uključivanjem u projekte EU za valorizaciju ukupnog kulturno-historijskog naslijeđa naše regije, pretvoriti u modernu turističku infrastrukturu historijskih znamenitosti.

- 3.2.5. *Rimsko pravo i pravno obrazovanje (I) – evropski kontekst, Bosna Franciscana*, br. 56, 2022, str. 143-154.** Rad nije kategoriziran. Komisija ga kategorizira kao pregledni naučni rad. U radu se analizira proces recepcije rimskog prava, koje preko srednjovjekovnog *ius commune* postaje pravnom tradicijom evropskog kontinentalnog pravnog kruga i opći fundament modernog evropskog privatnog prava. Objašnjava se zbog čega je rimsko pravo *ratio scripta* novog evropskog pravnog uređenja. U radu se ukazuje kako rimsko pravo svojim metodskim postavkama doprinosi ujednačavanju elemenata jedinstvene jurističke radne tehnike. Putevi izgradnje bezvremenskih rimskih pravnih principa trebaju biti putokaz u procesima harmonizacije i unifikacije evropskog prava i afirmacije evropskog pravnog duha u planetarnim okvirima. Rimsko pravo kao autohtona sveučilišna pravna disciplina predstavlja respektabilni naučni korpus. Naučna obrada rimskih pravnih koncepata u novom evropskom modulu pravničkog studija je postavljena kao centralna ishodišna dimenzija. Rimsko pravo je postalo univerzalna naučna disciplina. Cjelokupnom



analizom autor dokazuje kako pravni život Evrope predstavlja osebujno modificirani *modus vivendi* rimskih pravnih figura i instituta.

3.2.6. *Rimsko pravo i pravno obrazovanje (II) – Bosna i Hercegovina, Bosna Franciscana*, br. 57, 2022. Rad nije kategoriziran. Komisija ga kategorizira kao pregledni naučni rad. Rad predstavlja nastavak istraživanja o ulozi rimskog prava u pravnom obrazovanju. U okviru ovog članka autor obrađuje transformacijske procese koje je rimsko pravo kao disciplina prolazila na Pravnom fakultetu u Sarajevu, dajući kao savremenik osvrt na tendencije i pojave kojima je svjedočio. Autor analizira prve korake naučnog istraživanja i razrađivanja rimskog privatnog prava i njihovog preobražaja u sistematsku romanističku pravnu nauku utjelovljenu na većini poznatih evropskih univerziteta. Ukazuje na komparativne dimenzije. Detaljno analizira strukturne elemente nastavnog plana i programa iz predmeta Rimsko pravo i njemu pripadajućih izbornih predmeta. Na kraju daje prijedloge za poboljšanje kvaliteta studijskih programa kroz intenziviranje interdisciplinarnog naučnog dijaloga u regionalnim i širim evropskim prostorima.

Kandidat je objavio dva (2) članka u časopisu IUS ROMANUM. Izdavač časopisa je Univerzitet u Sofiji, a indeksiran je u međunarodnim referentnim bazama HEIN online, ERIH PLUS (European Reference Index for the Humanities) i Central and Eastern European Online Library (CEEOL).

3.2.7. *Die Allgemeine Europäische renaissance und der Zivilisatorische wert des Römischen rechts*, Ius Romanum – Res publica & Res privata, no. 2, 2019, str. 648-665 (izvorni naučni rad). Rad je napisan na njemačkom jeziku. U radu se ukazuje na značaj rimske jurisprudencije u modernom evropskom zakonodavstvu. Autor piše o pravnim metodama koje su i danas u punoj upotrebi i stalno se nadograđuju. Ukazuje na značaj istraživanja pretvaranja i transformacije rimskog prava u srednjovjekovni *ius commune*, koji je odigrao ključnu ulogu u razvoju savremenog prava. Rimsko pravo predstavlja uzor u aktuelnim



raspravama o usklađivanju, ujednačavanju i harmonizaciji privatnog prava u zemljama Evropske unije. Moderna pravna nauka rimskim je pravom dobila međunarodni karakter. U radu se ukazuje na recepciju rimskog prava kao složenu kulturno-historijsku pojavu koju treba promatrati kao proces naučne spoznaje evropske i svjetske pravne kulture. Historija rimskog prava i proces njegove recepcije može se shvatiti kao historija rimske pravne tradicije. Na kraju rada povučena je paralela između rimskog prava i prirodnog prava. Raspravlja se o vrednovanju rimskog prava, njegovoj važnosti kao pokretačkoj snazi u napretku reformi u području pravnog života i konačno kao temelja za komparativnopravne analize i temelja za kodifikatorske pokrete o kojima se raspravlja u Evropi.

- 3.2.8. *Obligationsrecht in den Briefen des Plinius des Jüngeren***, Ius Romanum – Provinciae, no. 2, 2022., str. 111-121 (izvorni naučni rad). Rad je napisan na njemačkom jeziku. Predstavlja jedan u nizu radova kojima autor piše o razumijevanju izvora rimskog prava. Ovaj rad posvećen je spoznajama o obligacionom pravu. Naime, iz korespondencije Plinija Mlađeg s njegovim brojnim prijateljima vidljivi su neki od elemenata obligacionog prava iz 1. i 2. stoljeća. U radu se analiziraju Plinijeva pisma 3:19; 7,18; 7, 30; 8,18; 9, 37; 10.4. Podaci sadržani u pismima daju vrijedan i zanimljiv uvid u intenzitet primjene odgovarajućih zakonskih rješenja u praksi (*law in action*). Budući da je u pismima isprepleteno nekoliko slojeva pravnih sfera, oni se mogu analizirati s različitih pravnih aspekata. U ovim pismima su obrađeni problemi: besplatni angažman, osnivanje fonda za alimentaciju, nedostatak produktivne radne snage, uvođenje nove statusne kategorije *colonia partiaria*, pojašnjenje aspekata prirodnog prava u ugovorima i povezana dilema *locatio conductio* ili *quasi societas*, uključujući i pravnu prirodu konzorcija. Rad nesporno rasvjetljava ova složena pitanja, a metajuridičkom analizom otvara spoznaje i iz sfera gospodarstva rimske države, čime bi mogao biti interesantan i široj naučnoj javnosti.



Kandidat je objavio jedan (1) rad u časopisu *Acta Illyrica*. Izdavač časopisa je udruženje za antičke studije BATHINVS. Časopis je indeksiran i arhiviran u međunarodnim referentnim bazama ERIH PLUS (European Reference Index for the Humanities), EBSCO host: Complementary Index, C.E.E.O.L. (Central Eastern European Online Library) i ROAD (Directory of Open Access scholarly Resources). Rad pod 3.2.9. je prošao recenzentski postupak i prihvaćen je od Redakcije časopisa za objavu, a što je vidljivo i iz potvrde priložene uz isti.

3.2.9. *Ciceronove reminiscencije o državi, Acta Illyrica*, sv. 6, 2022. (izvorni naučni rad). U radu koji je predmet recenzije autor je analizirao djela Marka Tulija Cicerona, velikog rimskog državnika, advokata, govornika i autora brojnih djela iz raznih disciplina. Članak možemo svrstati u oblast prava, filozofije i drugih srodnih nauka. Kao polazna osnova rada uzeta je Ciceronova definicija države u djelu *De republica* 1,39 koje govori upravo o pitanju prava, pravde, uređenja države, itd. Značajna pažnja je posvećena analizi utjecaja klasične grčke filozofije na Ciceronovo djelo, posebno po pitanju utjecaja Aristotelove etike i Platonovih stavova o državi. Na osnovu tih utjecaja, Ciceron je ponudio i vlastitu definiciju države. U radu se može opaziti akribičnost i dobro vladanje materijom od strane autora. Iako se radi o temi koja je dobro poznata i obrađena u literaturi, autor je uspio da ponudi vlastite perspektive, što daje posebnu vrijednost istom.

Kandidat je objavio jedan (1) rad u časopisu Dijalog – časopisu za filozofiju i društvenu teoriju Akademije nauka i umjetnosti Bosne i Hercegovine. Jedan (1) rad objavljen je u posebnom Zborniku radova u izdanju Akademije nauka i umjetnosti Bosne i Hercegovine.

3.2.10. *Dejtonski mirovni sporazum je potvrda državno-pravnog kontinuiteta Bosne i Hercegovine*, Dijalog – Časopis za filozofiju i društvenu teoriju, ANU BiH, 01-02/2020, str. 50-67. (Izvorni naučni rad). Ovim radom autor potvrđuje tezu o aktuelnosti antičkih rimsko-pravnih javnih koncepata i principa. Ukazuje na značaj i primjenu Okvirnog mirovnog sporazuma za Bosnu i Hercegovinu, dajući ocjenu stupnjeva njegove primjene



u nekoliko najvažniji strukturnih elemenata. U pokušaju iniciranja funkcionalnih promjena postojećih rješenja autor analizira pojedine javnopravne institute antičke rimske države kao *bona fides*, prirodno-pravno utemeljenje pojma ljudskih prava, *uti possidetis iuris*, *cursus honorum* i *ambitus*, kao eventualno primjenjive modele u određivanju pravaca funkcionalnih reformi bosansko-hercegovačkog društva. Posebna pažnja se posvećuje ocjeni dometa ustavnih rješenja iz Aneksa 4 sporazuma, uspostavljajući korelacije s vječno aktuelnim rješenjima iz antičke rimske države.

- 3.2.11. *O nekim segmentima aktualnosti državno-pravne misli akademika Hamdije Ćemerlića***, Posebna izdanja - Knjiga CXCI, Odjeljenje društvenih nauka, Knjiga 15, 75. Godišnjica Trećeg zasjedanja ZAVNOBiH-a: uloga Trećeg zasjedanja ZAVNOBiH-a u društvenom i političkom razvoju Bosne i Hercegovine, Zbornik radova, Akademija nauka i umjetnosti Bosne i Hercegovine, Sarajevo, 2020, str. 85-103. (Izvorni naučni rad). U prestižnom Zborniku ANUBiH autor je objavio rad posvećen razumijevanju nekih doprinosa akademika Hamdije Ćemerlića. O ulozi Ćemerlića autor piše analizirajući prijelomna razdoblja bh. pravne historije. Posebno se problematizira sadržaj Ćemerlićeva referata podnesenog na Trećem zasjedanju ZAVNOBiH-a i pokušava utvrditi njegova poveznica s Ćemerlićevim aktivnostima na prethodnim zasjedanjima ovog tijela. Vrš se analiza ocjena o socijalističkoj revoluciji u procesu njenog institucionaliziranja u formi nastanka nove državne tvorevine u najznačajnijem periodu izgradnje sistema narodne vlasti i državnosti Bosne i Hercegovine. Pokušava se dati odgovor koji su kriteriji bili odlučujući u konstituiranju naše države kao posebne federalne jedinice u okvirima složene državne zajednice, te koje su društvene determinante i procesi bili odlučujući u kreiranju takvog rješenja s posebnim osvrtom na međunarodni vojno-politički aspekt i pitanja političke legitimne reprezentativnosti. U radu autor izdvaja nekoliko segmenata iz složene državno-pravne filozofije Ćemerlića naglašavajući njihovu aktuelnost i savremenost.



Kandidat je objavio dva (2) stručna priloga.

3.2.12. *Imovinska šteta od rimskog do savremenog prava*, Pravna misao - časopis za pravnu teoriju i praksu, god. XLIX, br. 1-2, Sarajevo, 2018, str. 90-93. (*stručni prilog, recenzija*)
Tekst predstavlja recenziju naučne monografije, ujedno i prošireno izlaganje s promocije knjige prof. dr. sc. Samira Aličića o razvojnem putu koncepta imovinske štete od rimskog do savremenog prava, objavljenog u izdanju ugledne izdavačke kuće University Press. Tekst je napisan znalački i u najširem smislu doprinosi promoviranju romanističke nauke kroz ukazivanje na rimske temelje savremenih privatnopravnih rješenja.

3.2.13. *In Memoriam – Prof. dr. Vera Čučković (1.11.1933 – 27.7.2017)*, Pregled - časopis za društvena pitanja, god. LIX, br. 1, 2018, str. 197-199. (*stručni prilog, in memoriam*).
Tekst predstavlja *In memoriam* na prof. dr. sc. Veru Čučković, dugogodišnju profesoricu rimskog prava na Pravnom fakultet u Sarajevu s kojom je autor u počecima svoje akademske karijere blisko sarađivao. U tekstu je, na temelju dokumenata sačuvanih u arhivama službi Pravnog fakulteta Univerziteta u Sarajevu, rekonstruirana biografija i bibliografija prof. dr. sc. Vere Čučković, te je ukazano na njezin doprinos razvoju Pravnog fakulteta u Sarajevu.

3.3. Učešće u projektima

3.3.1. Počitelj – sjaj koji blijedi. Kandidat je participirao u naučno-stručnom projektu „Počitelj – sjaj koji blijedi“, a koji je u razdoblju od 2019-2020. godine provodilo udruženje *Trezvenost* iz Sarajevu uz saradnju s predstavnicima Vlade Federacije BiH. Kao paradigma stanja bh. kulturne i prirodne baštine odabran je srednjovjekovni grad Počitelj. Vlada FBiH je još 2001. godine, usvojila program po kojem se pristupilo revitalizaciji Počitelja u četiri faze: 1. faza – obnova porodičnih kuća sa ciljem povratka prognanih stanovnika, 2. faza – izgradnja Hadži Alijine džamije (Šišman Ibrahimove) i Likovne



kolonije, 3. faza – obnova infrastrukture, vode i struje, kao i tržnice i parking prostora, 4. faza – obnova hamama i hana. Za projekat revitalizacije zaduženo je bilo Federalno ministarstvo prostornog uređenja i okoliša i ministar Ramiz Mehmedagić, a nadzor je vršio Ekspertni tim. Nažalost, do revitalizacije nije došlo. Imajući u vidu kako je još 2007. godine, kulturno-historijska cjelina Počitelj upisana i na tentativnu (privremenu) listu kulturne baštine UNESCO-a, grupa eksperata (uključujući prof. dr. sc. Zdravka Lučića) okupljenih oko udruženja *Trezvenost* pristupilo je izradi projekta, a sve u cilju podizanja svijesti i pokretanja procesa obnove i zaštite Počitelja. Kao rezultat projekta proizašao je naučni-stručni Zbornik radova *Počitelj – sjaj koji blijedi*, u izdanju *Dobre knjige* iz Sarajeva, 2020. godine te organizacija naučno-stručne konferencije *Počitelj – A brilliance that fades*, u Bošnjačkom institutu – Fondacija Adil Zulfikarpašić 30. 11. 2020. godine. Učešćem na ovakvom projektu kandidat je potvrdio društveni angažman i stavljanje na raspolaganje svog znanja i višegodišnjeg iskustva u cilju očuvanja spomenika i opstojnosti Počitelja. Rezultati koji su proizašli iz projekta dali su snažan naučni i stručni poticaj u procesu afirmacije imena Počitelja kao svjetske kulturne i turističke destinacije. Uz naglašenu važnost rada na aktivnoj obnovi baštine, sistematskog pristupa problemu istraživanja, valorizacije i upravljanja Počiteljom, Zbornik, u čijoj izradi je kandidat sudjelovao iako namijenjen prvenstveno stručnoj javnosti, uz manju redakciju i prijevod na strane jezike može biti izvrstan materijal za putnike istraživače.

- 3.3.2. Societas pro iure Romano.** Kandidat je jedan od osnivača udruženja za rimsko pravo i rimsku pravnu tradiciju *Societas pro iure Romano* sa sjedištem u Sofiji (osnivačka skupština održana 2016. godine), koja ima za cilj promovirati istraživanja rimskog prava na području Jugoistočne Evrope. U okviru udruženja svake godine se realiziraju različiti projekti namijenjeni mladim romanistima te godišnje naučne konferencije u okviru kojih sudjeluju istraživači iz gotovo svih država Jugoistočne Evrope, Italije, Španjolske i Turske. Imajući u vidu kontinuirani doprinos kandidata u radu udruženja, međunarodna romanistička konferencija SIR za 2022. godinu bit će održana u Sarajevu u septembru



2022. godine. Kandidat je od strane Pravnog fakulteta Univerziteta u Sarajevu imenovan u Organizacijski odbor iste, a sve u cilju pripreme prijedloga projekta i njegove implementacije. Komisija cjelokupan anagažman vezan uz SIR cijeni kao izrazito značajnim za razvoj romanistike na našem području.

3.4. Referati za međunarodnim naučnim i stručnim skupovima od posljednjeg izbora

- 3.4.1.** Internacionalni kongres SIHDA, 3-7. 09. 2019., Edinburgh, Ujedinjeno Kraljevstvo. Naslov referata: *Römisches Recht als ratio scripta des Europäischen Rechts*.
- 3.4.2.** II Akademija evropskih integracija *Teorijski i praktični aspekti harmonizacije prava u EU*, u organizaciji Pravnog fakulteta u Sarajevu i Fondacije Konrad Adenauer, Sarajevo 31.10-1.11.2019. Naslov referata: *Ius commune kao izvor rješenja problema harmonizacije i usklađivanja pravnih propisa*.
- 3.4.3.** The Fourth International Conference of the Balkan Association of Roman Law and Roman Legal Traditions, *Res publica & Res privata*, Kragujevac, 7-9. 11. 2019. Naslov referata: *European Renaissance and Civilizational Values of Roman Law*.
- 3.4.4.** Naučno – stručna konferencija *A brilliance that fades*, Bošnjački institut – Fondacija Adil Zulfikarpašić, *Trezvenost* - Udruženje za promociju zdravog življenja, kulture ponašanja i razvijanje trezvenog odnosa u svim segmentima ljudskog života; AIASN –Asocijacija za interkulturalne aktivnosti i spašavanje naslijeđa u BiH; Društvo prijatelja kulturnih i prirodnih vrijednosti - Wigwam; Muzej Hercegovine Mostar, Sarajevo 30. 11. 2020. Naslov referata: *Počitelj kao poveznica antike, sadašnjosti i budućnosti*.
- 3.4.5.** Okrugli stol 25. godišnjica Dejtonskog mirovnog sporazuma: *Dosezi i problemi u izgradnji mira i funkcionalne države Bosne i Hercegovine*, u organizaciji Odjeljenja društvenih nauka Akademije nauka i umjetnosti Bosne i Hercegovine, Sarajevo, 11. 12. 2020. Naslov referata: *Dejtonski mirovni sporazum je potvrda državno-pravnog kontinuiteta Bosne i Hercegovine*.



- 3.4.6. Okrugli stol 75. *Godišnjica Trećeg zasjedanja ZAVNOBiH-a u društvenom i političkom razvoju Bosne i Hercegovine* u organizaciji ANUBiH, Odjeljenje društvenih nauka, Sarajevo, 2020. Naslov referata: *O nekim segmentima aktualnosti državno-pravne misli akademika Hamdije Čemerlića.*
- 3.4.7. Naučna konferencija *Razvoj naučnih disciplina na Pravnom fakultetu Univerziteta u Sarajevu povodom obilježavanja 75 godina Pravnog fakulteta u Sarajevu*, Sarajevo, 27. 09. 2021. Naslov referata: *Rimsko pravo – legitimacijski faktor evropskog identiteta.*

3.5. Nastavnički i mentorski rad

Kandidat dr. sc. Zdravko Lučić je predagoško iskustvo u nastavnom procesu sticao u okviru akademskog rada na Pravnom fakultet Univerziteta u Sarajevu od 1980. godine. Napisao je nekoliko udžbenika, od kojih se posebno izdvaja udžbenik *Rimsko privatno pravo* koristi kao obavezna literatura na univerzitetima širom Bosne i Hercegovine i Republike Hrvatske. U okviru prvog ciklusa studija držao je predavanja i ispite iz predmeta: *Rimsko pravo, Institucije rimskog prava, Rimsko pravo I, Rimsko pravo II, Osnove evropskog privatnog prava, Klasični pravni tekstovi*. U okviru drugog ciklusa studija držao je predavanja i ispite iz predmeta: *Rimsko pravo – historija i institucije, Konsenzualizam u rimskom obaveznom pravu, Rimsku pravna kultura i Ius commune*. U ak. 2021/22. godine je određen za nositelja predmeta *Pravne kulture Jugoistočne Evrope* na trećem ciklusu studija (doktorski studij). Predsjednik ove Komisije ističe kako je kao bivši šef Katedre za pravnu historiju i komparativno pravo upoznat s činjenicom da studenti Pravnog fakulteta u Sarajevu, u okviru obaveznih godišnjih evaluacija, predavanja i nastavnički rad kandidata u pravilu ocjenjuju najvišim ocjenama. U okviru Potvrde br. 01-1024-1/22 od 23. 5. 2022. godine izdate od strane Pravnog fakulteta Univerziteta u Sarajevu, vidljivo je kako je kandidat uspješno mentorirao ukupno 9 (devet) kandidata na drugom ciklusu studija. Također, iz priložene Odluke o izmjeni i dopuni Komisije za ocjenu i odbranu projekta, radne verzije i doktorske disertacije br. 01-6-125/22 od 27. 4. 2022. godine imenovan je i



za jednog od mentora kandidatu Mirzi Hebibu, mag. iur. na doktorskoj disertaciji *Plodouživanje (ususfructus): primjena rimskog koncepta u dubrovačkom pravu*.

4. Zaključna ocjena i prijedlog Komisije

Na Konkurs za izbor nastavnika u zvanje redovnog profesora na predmetima oblasti Rimsko pravo na Pravnom fakultetu Univerziteta u Sarajevu, prijavio se jedan kandidat dr. sc. Zdravko Lučić, vanredni profesor za oblast Rimsko pravo.

Analizirajući biografiju i bibliografiju kandidata, Komisija je konstatirala kako kandidat dr. sc. Zdravko Lučić ima bogato akademsko iskustvo, koje uključuje značajne doprinose i u naučnoj i u nastavnoj komponenti. Kandidat u svojim naučnim radovima obrađuje niz relevantnih pitanja iz oblasti rimskog prava, s osobitim fokusom na nepravne izvore prava i evolutivne dimenzije rimskog prava kao temelja za izgradnju savremenog prava. U nekim radovima pažnju usmjerava na bh. pravnu tradiciju afirmirajući njezin položaj u evropskoj pravnoj kulturi. Objavljeni radovi kandidata, objavljeni u domaćim i međunarodnim časopisima, s domaćim i međunarodnim recenzijama, njegova učešća na međunarodnim i domaćim naučnim i stručnim skupovima te naučno-istraživački projekti u kojima je sudjelovao nesporno potvrđuju njegovu prepoznatljivost u širim međunarodnim naučnim krugovima. Također, Komisija prepoznaje kako kroz projekte i radove kandidata jasno dolazi do izražaja tendencija doprinosa bh. društvu kroz aplikativnost projekata i naučnih spoznaja do kojih dolazi.

U odnosu na istaknuto, a u vezi s uslovima propisanim Zakonom o viskom obrazovanju KS, Komisija procjenjuje kako je kandidat:



- 1) Proveo izborni period u zvanju vanrednog profesora, i to od 2007. do 2018. godine, te od 2018. do 2022. godine;
- 2) Objavio dvije (2) knjige od posljednjeg izbora (2018.) u izdanju Pravnog fakulteta Univerziteta u Sarajevu, koje su pozitivno ocijenjene od strane inozemnih recenzenata;
- 3) Objavio trinaest (13) naučnih i stručnih radova u priznatim publikacijama koje prate relevantne naučne baze podataka, na bosanskom i njemačkom jeziku, sve od posljednjeg izbora 2018. godine, a od čega je sedam (7) kategorizirano kao izvorni naučni rad, a (4) četiri kao pregledni naučni rad, a dva (2) kao stručni prilog;
- 4) Uspješno ostvario (9) devet mentorstva na drugom ciklusu studija u okviru Katedre za pravnu historiju i komparativno pravo;
- 5) Participirao u dva naučna projekta, od kojih je kod jednog Komisija konstatirala značajan međunarodni doprinos u pogledu afirmacije nauke rimskog prava na području Jugoistočne Evrope, dok je kod drugog prepoznala društveni angažman i doprinos revitalizaciji bh. kulturno-historijske baštine.

U pogledu nezadovoljavanja uslova mentorstva na trećem ciklusu studija (doktorski studij), Komisija je konstatirala kako je kandidat imenovan za jednog od mentora na doktorskoj disertaciji koja je u završnoj fazi, no cijeneći da ista nije odbranjena, nije zadovoljen zakonom propisan uvjet mentorstva za treći ciklus pa Komisija primjenjujući odredbu člana 115, stav (2) konstatira kako kandidat iz objektivnih razloga nije ispunio uslov mentorstva za treći ciklus, te uvodi supstituiranje mentorstva s tri dodatna naučna rada objavljena u citatnim bazama podataka, a što kandidat zadovoljava cijeneći da je objavio ukupno jedanaest (11) naučnih radova, od čega je osam (8) propisano kao minimalni uslov članom 96, stav (1), tačke f) ZVO, dok tri dodatna cijenimo u smislu odredbe člana 115, stav (2).



Na osnovu svega izloženog u ovom Izvještaju, cijeneći sve stručne, naučno-istraživačke i pedagoške kvalitete, te odgovarajuće reference u pogledu zakonom propisanih uslova, Komisija jednoglasno procjenjuje da kandidat dr. sc. Zdravko Lučić ispunjava uslove propisane odredbama člana 96, stav (1), tačke f) Zakona o visokom obrazovanju, te članova 194, stav (1), tačka f) i člana 196. Statuta Univerziteta za izbor u akademsko zvanje redovnog profesora za predmete naučne oblasti Rimsko pravo, te Vijeću Pravnog fakulteta Univerziteta u Sarajevu

PREDLAŽE

da se dr. sc. Zdravko Lučić izabere u zvanje **redovnog profesora** za oblast **Rimsko pravo** na Pravnom fakultetu Univerziteta u Sarajevu

KOMISIJA

Prof. dr. sc. Enes Durmišević

Prof. dr. sc. Mirela Šarac

Prof. dr. sc. Marija Ignjatović